

四庫全書

子部

欽定四庫全書

子部  
稗編卷五十

詳校官中書臣賈 鏞

主事臣祁韻士覆勘

總校官中書臣朱 鈐

校對官檢討臣郭 寅

謄錄監生臣許祖懷

欽定四庫全書

稗編卷五十

明 唐順之 撰

諸家八

天文

唐日月變食字彙諸變

歐陽脩 後同

武德元年十月壬申朔日有食之在氏五度占曰諸侯專權則其應在所宿國諸侯附從則為王者事四年八月丙戌朔日有食之在翼四度楚分也六年十二月壬寅朔日有食之在南斗十九度吳分也九年十月丙辰

朔日有食之在氏七度貞觀元年閏三月癸丑朔日有食之在胃九度九月庚戌朔日有食之在亢五度胃為天倉亢為䟽廟二年三月戊申朔日有食之在婁十一度占為大臣憂三年八月己巳朔日有食之在翼五度占曰旱四年閏正月丁卯朔日有食之在營室四度七月甲子朔日有食之在張十四度占為禮失六年正月乙卯朔日有食之在虛九度虛耗祥也八年五月辛未朔日有食之在參七度九年閏四月丙寅朔日有食之

在畢十三度占為邊兵十一年三月丙戌朔日有食之  
在婁二度占為大臣憂十二年閏二月庚辰朔日有食  
之在奎九度奎武庫也十三年八月辛未朔日有食之  
在翼十四度翼為遠夷十七年六月己卯朔日有食之  
在東井十六度京師分也十八年十月辛丑朔日有食  
之在房三度房將相位二十年閏二月癸巳朔日有食  
之在胃九度占曰主有疾二十二年八月己酉朔日有  
食之在翼五度占曰早顯慶五年六月庚午朔日有食

之在柳五度龍朔元年五月甲子晦日有食之在東井  
二十七度皆京師分也麟德二年閏三月癸酉朔日有  
食之在胃九度占曰主有疾乾封二年八月己酉朔日  
有食之在翼六度總章二年六月戊申朔日有食之在  
東井二十九度咸亨元年六月壬寅朔日有食之在東  
井十八度二年十一月甲午朔日有食之在箕九度三  
年十一月戊子朔日有食之在尾十度東井京師分箕  
為后妃之府尾為后宫五年三月辛亥朔日有食之在

婁十三度占為大臣憂永隆九年十一月壬申朔日有  
食之在尾十六度開耀元年十月丙寅朔日有食之在  
尾四度永淳元年四月甲子朔日有食之在畢五度十  
月庚申朔日有食之在房三度垂拱二年二月辛未朔  
日有食之在營室十五度四年六月丁亥朔日有食之  
在東井二十七度京師分也天授二年四月壬寅朔日  
有食之在昴七度如意元年四月丙申朔日有食之在  
胃十一度皆正陽之月長壽二年九月丁亥朔日有食

之在角十度角內為天庭延載元年九月壬午朔日有食之在軫十八度軫為車騎證聖元年二月己酉朔日有食之在營室五度聖曆三年五月己酉朔日有食之在畢十五度長安二年九月乙丑朔日有食之幾既在角初度三年三月壬戌朔日有食之在奎十度占曰君不安九月庚寅朔日有食之在亢七度神龍三年六月丁卯朔日有食之在東井二十八度京師分也景龍元年十二月乙丑朔日有食之在南斗二十一度斗為丞



相位先天元年九月丁卯朔日有食之在角十度開元  
二年七月庚辰朔日有食之在張四度七年五月己丑  
朔日有食之在畢十五度九年九月乙巳朔日有食之  
在軫十八度十二年閏十二月丙辰朔日有食之在虛  
初度十七年十月戊午朔日有食之不盡如鉤在氐九  
度二十年二月甲戌朔日有食之在營室十度八月辛  
未朔日有食之在翼七度二十一年七月乙丑朔日有  
食之在張十五度二十二年十二月戊子朔日有食之

在南斗二十三度二十三年閏十一月壬午朔日有食  
之在南斗十一度二十六年九月丙申朔日有食之在  
亢九度二十八年三月丁亥朔日有食之在婁三度天  
寶元年七月癸卯朔日有食之在張五度五載五月壬  
子朔日有食之在畢十六度十三載六月乙丑朔日有  
食之幾既在東井十九度京師分也至德元載十月辛  
巳朔日有食之既在氐十度上元二年七月癸未朔日  
有食之既大星皆見在張四度大曆三年三月乙巳朔

日有食之在奎十一度十一年十月辛酉朔日有食之  
在氏十一度宋分也十四年七月戊辰朔日有食之在  
張四度十二月丙寅晦日有食之在危十二度貞元三  
年八月辛巳朔日有食之在軫八度五年正月甲辰朔  
日有食之在營室六度八年十一月壬子朔日有食之  
在尾六度宋分也十二年八月己未朔日有食之在翼  
十八度占曰旱十七年五月壬戌朔日有食之在東井  
十度元和三年七月辛巳朔日有食之在七星三度十

年八月己亥朔日有食之在翼十八度十三年六月癸丑朔日有食之在輿鬼一度京師分也長慶二年四月辛酉朔日有食之在胃十三度三年九月壬子朔日有食之在角十二度太和八年二月壬午朔日有食之在奎一度開成元年正月辛丑朔日有食之在虛三度會昌三年二月庚申朔日有食之在東壁一度并州分也四年二月甲寅朔日有食之在營室七度五年七月丙午朔日有食之在張七度六年十二月戊辰朔日有食

之在南斗十四度大中二年五月己未朔日有食之在  
參九度八年正月丙戌朔日有食之在危二度危為玄  
枵亦耗祥也咸通四年七月辛卯朔日有食之在張十  
七度乾符三年九月乙亥朔日有食之在軫十四度四  
年四月壬申朔日有食之在畢三度六年四月庚申朔  
日有食之既在胃八度文德元年三月戊戌朔日有食  
之在胃一度天祐元年十月辛卯朔日有食之在心二  
度三年四月癸未朔日有食之在胃十二度凡唐著紀

二百八十九年日食九十三朔九十一晦二日一日變  
貞觀初突厥有五帝並照二十三年三月日赤無光李  
淳風曰日變色有軍急又曰其君無德其臣亂國濮陽  
復曰日無光主病咸亨元年二月壬子日赤無光癸丑  
四方濛濛日有濁氣色赤如赭上元二年三月丁未日  
赤如赭永淳元年三月日赤如赭文明元年二月辛巳  
日赤如赭長安四年正月壬子日赤如赭景龍三年二  
月庚申日色紫赤無光開元十四年十二月己未日赤

如赭二十九年三月丙午風霾日無光近晝昏也占為  
上刑急人不樂生天寶三載正月庚戌日暈五重占曰  
是為棄光天下有兵肅宗上元二年二月乙酉白虹貫  
日大曆二年七月丙寅日旁有青赤氣長四丈餘壬申  
日上有赤氣長二丈九月乙亥至于辛丑日旁有青赤  
氣三年正月丁巳日有黃冠青赤珥辛丑亦如之凡氣  
長而立者為直橫者為格立于日上者為冠直為有自  
立者格為戰鬪又曰赤氣在日上君有佞臣黃為土功

青赤為憂貞元二年閏五月壬戌日有黑暈六年正月  
甲子日赤如血十年三月乙亥黃霧四塞日無光元和  
二年十月壬午日旁有黑氣如人形跪手捧盤向日盤  
中氣如人頭四年閏三月日旁有物如日五年四月辛  
未白虹貫日十年正月辛卯日外有物如鳥十一年正  
月己卯日紫赤無光長慶元年六月己丑白虹貫日三  
年二月庚戌白虹貫日寶曆元年六月甲戌赤虹貫日  
九月甲申日赤無光二年三月甲午日中有黑氣如椀



辛亥日中有黑子四月甲寅白虹貫日太和二年二月  
癸亥日無光白霧晝昏十二月癸亥有黑侵與日如鬪  
五年二月辛丑白虹貫日六年三月有黑侵與日如鬪  
庚戌日中有黑子四月乙丑黑氣磨日七年正月庚戌  
白虹貫日八年七月甲戌白虹貫日日有交暈十月壬  
寅白虹貫日東西際天上有背玦九年二月辛卯日月  
赤如血壬辰亦如之開成元年正月辛丑朔白虹貫日  
二月己丑亦如之二年十一月辛巳日中有黑子大如

雞卵日赤如赭晝昏至于癸未五年正月己丑日暈白虹在東如玉環貫珥二月丙辰日有重暈有赤氣夾日十二月癸卯朔日旁有黑氣來觸會昌元年十一月庚戌日中有黑子四年正月戊申日無光二月己巳白虹貫日如玉環大中十三年四月甲午日暗無光咸通六年正月白虹貫日中有黑氣如雞卵七年十二月癸酉白氣貫日日有重暈甲戌亦如之白氣兵象也十四年二月癸卯白虹貫日乾符元年日中有黑子二年日中

有若飛鷺者六年十一月丙辰朔有兩日並出而鬪三日乃不見鬪者離而復合也廣明元年日暈如虹黃氣蔽日無光日不可以二虹百殃之本也中和三年三月丙午日有青黃暈四月丙辰亦如之丁巳戊午又如之光啟三年十一月己亥下晡日上有黑氣四年二月己丑日赤如血庚寅改元文德是日風日赤無光景福元年五月日色散如黃金光化三年冬日有虹蜺背瑤彌旬日有赤氣自東北至于東南天復元年十月日色散

如黃金十一月又如之三年二月丁丑日有赤氣自東北至于東南天祐元年二月丙寅日中見北斗其占重十一月癸酉日中日有黃暈旁有青赤氣二三年正月甲申日有黃白暈暈上有青赤背乙酉亦如之暈中生白虹漸東長百餘丈二月己巳日有黃白暈如半環有蒼黑雲夾日長各六尺餘既而雲變狀如人如馬乃消舊占背者叛背之象日暈有虹者為大戰半暈者相有謀蒼黑侵祥也夾日者賊臣制君之象變而如人者為

叛臣如馬者為兵三年正月辛未日有黃白暈上有青  
赤背二月癸巳日有黃白暈如半環有青赤背庚戌日  
有黃白暈青赤背月變貞觀初突厥有三月並見儀鳳  
二年正月甲子朔月見西方是謂朏朏則侯王其舒武  
太后時月過望不虧者二天寶三載正月庚戌月有虹  
氣如垂帶肅宗元年建子月癸巳乙夜月掩昴而暈色  
白有白氣自北貫之昴胡也白氣兵喪建辰月丙戌月  
有黃白冠連暈圍東井五諸侯兩河及輿鬼東井京師

分也大歷十年九月戊申月暈熒惑畢昴參東及五車  
暈中有黑氣乍合乍散十二月丙子月出東方上有白  
氣十餘道如匹練貫五車及畢觜觜參東井輿鬼柳軒  
轅中夜散去占曰女主凶白氣為兵喪五車主庫兵軒  
轅為后宮其宿則晉分及京師也元和十一年己未旦  
日已出有虹貫月于營室開成四年閏正月甲申朔乙  
酉月在營室正偃魄質成早也占為臣下專恣之象五  
年正月戊寅朔甲申月昏而中未弦而中早也占同上

景福二年十一月有白氣如環貫月穿北斗連太微天  
復二年十二月甲申夜月有三暈裏白中赤黃外綠天  
祐三年二月丙申月暈熒惑孛彗武德二年九月壬午  
有星孛于胃昴間丁亥孛于卷舌孛與彗皆非常惡氣  
所生而災甚于彗貞觀八年八月甲子有星孛于虛危  
歷玄枵乙亥不見十二年三月乙丑有星孛于畢昴十  
五年六月巳酉有星孛于太微犯郎位七月甲戌不見  
龍翔三年八月癸卯有彗星于左攝提長二尺餘乙巳

不見攝提建時節大臣象乾封二年四月丙辰有彗星于東北在五車畢昴間乙亥不見上元二年十二月壬午有彗星于角亢南長五尺三年七月丁亥有彗星于東井止北河長三尺餘東北行光芒益盛長三丈掃中台指文昌九月乙酉不見東井京師分中台文昌將相位兩河天闕也開耀元年九月丙申有彗星于天市中長五丈漸小東行至河鼓癸丑不見市者貨食之所聚以衣食生民者一曰帝將遷都河鼓將軍象永淳二年



三月丙午有彗星于五車北四月辛未不見光宅元年  
九月丁丑有星如半月見于西方月衆陰之長星如月  
者陰盛之極文明元年七月辛未夕有彗星于西方長  
丈餘八月甲辰不見是謂天攬景龍元年十月壬午有  
彗星于西方十一月甲寅不見二年二月丁酉有星孛  
于胃昴間胡分也八月壬辰有星孛于紫宮延和元年  
六月有彗星自軒轅入太微至大角滅開元十八年六  
月甲子有彗星于五車癸酉有星孛于畢昴二十六年

三月丙子有星孛于紫宮垣歷北斗魁旬餘因雲陰不見乾元三年四月丁巳有彗星于東方在婁胃間色白長四尺東方疾行歷昴畢觜觶參東井輿鬼柳軒轅至右執法西凡五旬餘不見閏月辛酉朔有彗星于西方長數丈至五月乃滅婁為魯胃昴畢為趙觜觶參為唐東井輿鬼為京師分柳其半為周分二彗仍見者荐禍也又婁胃間天倉大厯元年十二月己亥有彗星于匏瓜長尺餘經二旬不見犯宦者星五年四月己未有彗

星于五車光芒蓬勃長三丈五月己卯彗星見于北方  
色白癸未東行近八穀中星六月癸卯近三公己未不  
見占曰色白者太白所生也七年十二月丙寅有長星  
于參下其長亘天長星彗屬參唐星也元和十年三月  
有長星于太微尾至軒轅十二年正月戊午有彗星于  
畢長慶元年正月己未有星孛于翼二月丁卯孛于太  
微西上將六月有彗星于昴長一丈凡十日不見太和  
二年七月甲辰有彗星于右攝提南長二尺三年十月

客星見于水位八年九月辛亥有彗星于太微長丈餘  
西北行越郎位庚申不見開成二年二月丙午有彗星  
于危長七尺餘西指南斗戊申在危西南芒耀愈甚癸  
丑在虛辛酉長丈餘西行稍南指壬戌在婺女長二丈  
餘廣三尺癸亥愈長且闊三月甲子在南斗乙丑長五  
丈其末兩岐一指氐一掩房丙寅長六丈無岐北指在  
亢七度丁卯西北行東指己巳長八丈餘在張癸未長  
三尺在軒轅右不見凡彗星晨出則西指夕出則東指

乃常也未有遍指四方凌犯如此之甚者甲申客星出于東井下戊子客星别出于端門內近屏星四月丙午東井下客星沒五月癸酉端門內客星沒壬午客星如孛在南斗天籥旁八月丁酉有彗星于虛危虛危為玄枵玄枵耗名也三年十月乙巳有彗星于軫魁長二丈餘漸長西指十一月乙卯有彗星于東方在尾箕東西亘天十二月壬辰不見四年正月癸酉有彗星于羽林衛分也閏月丙午有彗星于卷舌西北二月己卯不見

五年二月庚申有彗星于營室東壁間二十日滅十一月戊寅有彗星于東方燕分也會昌元年七月有彗星于羽林營室東壁間也十一月壬寅有彗星于北落師門在營室入紫宮十二月辛卯不見并州分也大中六年三月有彗星于觜參觜參唐星也十一年九月乙未有彗星于房長三尺咸通五年五月己亥夜漏未盡一刻有彗星出于東北色黃白長三尺在婁徐州分也九年正月有彗星于婁胃十年八月有彗星于大陵東北

指占為外夷兵及水災乾符四年五月有彗星光啟元年有彗星于積水積薪之間二年五月丙戌有星孛于尾箕歷北斗攝提占曰貴臣誅大順二年四月庚辰有彗星于三台東行入太微掃大角天市長十丈餘五月甲戌不見宦者陳匡知星奏曰當有亂臣入宮三台太乙三階也太微大角帝庭也天市都市也景福元年五月蚩尤旗見初出有白彗形如髮長一尺許經數日乃從中天下如匹布至地如蛇六月孫儒攻揚行密于宣

州有黑雲如山漸下墜于儒營上狀如破屋占曰營頭  
星也十一月有星孛于斗牛占曰越有自立者十二月  
丙子天攬出于西南己卯化為雲而沒二年三月天久  
陰至四月乙酉夜雲稍開有彗星于上台長十餘丈因  
雲陰不見乾寧元年正月有星孛于鶉首秦分也又星  
隕于西南有聲如雷七月妖星見非彗非孛不知其名  
時人謂之妖星或曰惡星三年十月有客星三一大二小  
在虛危間乍合乍離相隨東行狀如鬪經三日而二小



星沒其大星後沒虛危齊分也光化三年正月客星出  
于中垣宦者旁大如桃光炎射宦者宦者不見天復元  
年五月有三赤星各有鋒芒在南方既而西方北方東  
方亦如之頃之又各增一星凡十六星少時先從北滅  
占曰濛星也見則諸侯兵相攻二年正月客星如桃在  
紫宮華蓋下漸行至御女丁卯有流星起文昌抵客星  
客星不動已巳客星在杠守之至明年猶不去占曰將  
相出兵五月夕有星當箕下如炬火炎炎上衝人初以

為燒火也高丈餘乃隕占曰機星也下有亂天祐元年  
四月有星狀如人首赤身黑在北斗下紫微中占曰天  
衝也天衝抱極泣帝前血濁霧下天下寃後三日而黑  
風晦冥二年四月庚子夕西北隅有星類太白上有光  
似彗長三四丈色如赭辛丑夕色如縞或曰五車之水  
星也一曰昭明星也甲辰有彗星于北河貫文昌長三  
丈餘陵中台下台五月乙丑夜自軒轅左角及天市西  
垣光芒猛怒其長亘天丙寅陰雲至辛未少霽不見兩

河為天闕在東井間而北河中國所經也文昌天之六  
司天市都市也星變武德三年十月己未有星隕于東  
都中隱隱有聲貞觀二年天狗隕于夏州城中十四年  
八月有星隕于高昌城中十六年六月甲辰西方有流  
星如月西南行三丈乃滅占曰星甚大者為人主十八  
年五月流星出東壁有聲如雷占曰聲如雷者怒象十  
九年四月己酉有流星向北斗杓而滅永徽三年十月  
有流星貫北極四年十月睦州女子陳碩真反婺州刺

史崔義立討之有星隕于賊營乾封元年正月癸酉有  
星出太微東流有聲如雷咸亨元年十一月西方有流  
星聲如雷調露元年十一月戊寅流星入北斗魁中乙  
巳流星燭地有光使星也神龍三年三月丙辰有流星  
聲如頰墻光燭天地景龍二年二月癸未有大星隕于  
西南聲如雷野雉皆雊景雲元年八月己未有流星出  
五車至上台滅九月甲申有流星出中台至相滅太極  
元年正月辛卯有流星出太微至相滅延和元年六月

幽州都督孫佺討奚契丹出師之夕有大星隕于營中  
開元二年五月乙卯晦有星西北流或如甕或如斗貫  
北極小者不可勝數天星盡搖至曙乃止占曰星民象  
流者失其所也漢書曰星搖者民勞十二年十月壬辰  
流星大如桃色赤黃有光燭地占曰色赤為將軍使天  
寶三載閏二月辛亥有星如月墜于東南墜後有聲至  
德二載賊將武令珣圍南陽四月甲辰夜中有大星赤  
黃色長十數丈光燭地墜賊營中十一月壬戌有流星

大如斗東北流長數丈蛇行屈曲有碎光迸出占曰是  
謂枉矢廣德二年六月丁卯有妖星隕于汾州十二月  
丙寅自乙夜至曙星流如雨大厯二年九月己丑晝有  
星如一斗器色黃有尾長六丈餘出南方没于東北東  
北于中國則幽州分也三年九月乙亥有星大如斗北  
流有光燭地占為貴使六年九月甲辰有星西流大如  
一斗器光燭地有尾迸光如珠長五丈出婺女入天市  
南垣滅八年六月戊辰有流星大如一升器有尾長三

丈餘入太微十二月壬申有流星大如一升噐有尾長  
二丈餘出紫微入濁十年三月戊戌有流星出于西方  
如二升噐有尾長二丈入濁十二年二月辛亥有流星  
如桃尾長十丈出匏瓜入太微建中四年八月庚申有  
星隕于京師興元元年六月戊午星或什或伍而隕貞  
元三年閏五月戊寅枉矢墜于虛危十四年閏五月辛  
亥有星墜于東北光燭如晝聲如雷元和二年十二月  
己巳西北有流星亘天尾散如珠占曰有貴使四年八

月丁丑西北有大星東南流聲如雷鼓六年三月戊戌日晡天陰寒有流星大如一斛噐墜于兗鄆間聲震數百里野雉皆雊所墜之上有赤氣如立蛇長丈餘至夕乃滅時占者以為日在戌魯分也不及十年其野主殺而地分九年正月有大星如半席自下而升有光燭地羣小星隨之四月辛巳有大流星尾迹長五丈餘光燭地至右攝提西滅十二年九月己亥甲夜有流星起中天首如甕尾如二百斛船長十餘丈聲如羣鴨飛明若



火炬過月下西流須臾有聲磬磬墜地有大聲如壞屋者三在陳蔡間十四年五月己亥有大流星出北斗魁長一丈餘南抵軒轅而滅占曰有赦赦視星之大小十五年七月癸亥有大星出鉤陳南流至婁滅長慶元年正月丙辰有大星出狼星北色赤有尾迹長三丈餘光燭地東北流至七星乃滅四月有大星墜于吳聲如飛羽七月乙巳有大流星出參西北色黃有尾迹長六七丈光燭地至羽林滅八月辛巳東北方有大星自雲中

出色白光燭地前銳後大長二丈餘西北流入雲中滅  
二年四月辛亥有流星出天市光燭地隱隱有聲至郎  
位滅市者小人所聚郎在天庭中主宿衛六月丁酉有  
小星隕于房心間戊戌亦如之己亥亦如之閏十月  
丙申有流星大如斗抵中台上星三年八月丁酉夜有  
大流星如數斗器起西北經奎婁東南流去月甚近光  
散落墜地有聲四年四月紫微中星隕者衆十月乙卯  
有大流星出天船犯斗魁樞星而滅占曰有舟楫事丙

子有大流星出天將軍東北入濁寶曆元年正月乙卯  
有流星出北斗樞星光燭地入濁占曰有赦二年五月  
癸巳西北有流星長三丈餘光燭地入天市中滅占為  
有誅七月丙戌日初入東南有流星向南滅以晷度推  
之在箕斗間八月丙申有大流星出王良長四丈餘至  
北斗杓滅王良奉車御官也大和四年八月辛未自昏  
至戊夜流星或大或小觀者不能數占曰民失其所王  
者失道網紀廢則然又曰星在野象物在朝象官七年

六月戊子自昏及曙四方流星大小縱橫百餘八年六月辛巳夜中有流星出河鼓赤色有尾迹光燭地迸如散珠北行近天棓滅有聲如雷河鼓為將軍天棓者帝之武備九年六月丁酉自昏至丁夜流星二十餘縱橫出沒多近天漢開成二年九月丁酉有星大如斗長五丈自室壁西北流入大角下沒行類枉矢中天有聲小星數百隨之十一月丁丑有大星隕于興元府署寢室之上光燭庭宇三年五月乙丑有大星出于柳張尾長

五丈餘再出再沒四年二月己亥丁夜至戊夜四方中  
天流星小大凡二百餘並西流有尾迹長二丈至五丈  
八月辛未流星出羽林有尾迹長八丈餘有聲如雷羽  
林天軍也十二月壬申蚩尤旗見會昌元年六月戊辰  
自昏至戊夜小星數十縱橫流散占曰小星民象七月  
庚午北方有星光燭地東北流經王良有聲如雷十一  
月壬寅有大星東北流光燭地有聲如雷四年八月丙  
午有大星如炬火光燭天地自奎婁掃七方七宿而隕

六年二月辛丑夜中有流星赤色如桃光燭地有尾迹貫紫微入濁咸通六年七月乙酉甲夜有大流星長數丈光爍如電羣小星隨之自南徂北其象南方有以衆叛而之北也九年十一月丁酉有星出如匹練亘空化為雲而沒在楚分是謂長庚見則兵起十三年春有二星從天際而上相從至中天狀如旌旗乃隕九月蚩尤旗見乾符二年冬有二星一赤一白大如斗相隨東南流燭地如月漸大光芒猛怒三年晝有星如炬火大如

五升器出東北徐行隕于西北四年七月有大流星如  
盂自虛危歷天市入羽林滅占為外兵中和元年有異  
星出于輿鬼占者以為惡星八月己丑夜星隕如雨或  
如柷椀者交流如織庚寅夜亦如之至丁酉止三年十  
一月夜星隕于西北如雨光啟二年九月有大星隕于  
揚州府署延和閣前聲如雷炎光燭地十月壬戌有星  
出於西方色白長一丈五尺屈曲而隕占曰長庚也下  
則流血三年五月秦宗權擁兵于汴州北郊書有大星

隕于其營聲如雷是謂營頭其下破軍殺將乾寧元年  
夏有星隕于越州後有光長丈餘狀如蛇或曰枉矢也  
三年六月天暴雨雷電有星大如椀起西南墜于東北  
色如鶴練聲如羣鴨飛占為姦謀光化元年九月丙子  
有大星墜于北方三年三月丙午有星如二十斛船色  
黃前銳後大西南行十一月中天有大星自東緩流如  
帶屈曲光凝著天食頃乃滅是謂枉矢天復三年二月  
帝至自鳳翔其明日有大星如月自東濁際西流有聲



如雷尾跡橫貫中天三夕乃滅天祐元年五月戊寅乙  
夜雨晦暝有星長二十丈出東方西南向首黑尾赤中  
白枉矢也一曰長星二年三月乙丑夜中有大星出中  
天如五斗器流至西北去地十丈許而止上有星芒炎  
如火赤而黃長丈五許而蛇行小星皆動而東南其隕  
如雨少頃沒後有蒼白氣如竹叢上衝天中色曹曹占  
曰亦枉矢也三年十二月昏東方有星如太白自地徐  
上行極至中天如上弦月乃曲行頃之分為二占曰有

大孽

月五星凌犯聚合占

月五星凌犯及星變隋大業十三年六月鎮星羸而旅于參參唐星也李淳風曰鎮星主福未當居而居所宿國吉義寧二年三月丙午熒惑入東井占曰大人憂武德元年五月庚午太白晝見占曰兵起臣彊六月丙子熒惑犯右執法占曰執法大臣象二年七月戊寅月犯牽牛凡月與列宿相犯其宿地憂牽牛吳越分九月庚

寅太白晝見冬熒惑守五諸侯六年七月癸卯熒惑犯  
輿鬼西南星占曰大臣有誅七年六月熒惑犯右執法  
七月戊寅歲星犯畢占曰邊有兵八年九月癸丑熒惑  
入太微太微天廷也冬太白入南斗南斗主爵祿九年  
五月太白晝見六月丁巳經天己未又經天在秦分丙  
寅月犯氐氐為天子宿宮己卯太白晝見七月辛亥晝  
見甲寅晝見八月丁巳晝見太白金經天者陰乘陽  
也貞觀三年三月丁丑歲星逆行入氐占曰人君治宮

室過度一曰饑五年五月庚申鎮星犯鍵閉占為腹心  
喉舌臣九年四月丙午熒惑犯軒轅十年四月癸酉復  
犯之占曰熒惑主禮禮失而後罰出焉軒轅為后宮十  
一年二月癸未熒惑入輿鬼占曰賊在大人側十二年  
六月辛卯熒惑入東井占曰旱十三年五月乙巳犯右  
執法六月太白犯東井北轅井京師分也十四年十一  
月壬午月入太微占曰君不安十五年二月熒惑逆行  
犯太微東上相十六年五月太白犯畢左股畢為邊將

六月戊戌晝見九月己未熒惑犯太微西上將十月丙戌  
入太微犯左執法十七年二月犯鍵閉三月丁巳守心前  
星癸酉逆行犯鉤鈐鈐熒惑常以十月入太微受制而出伺  
其所守犯天子所誅也鍵閉為腹心喉舌臣鉤鈐以開闔天  
心皆貴臣象十八年十一月乙未月掩鉤鈐十九年七月  
壬午太白入太微是夜月掩南斗太白遂犯左執法光芒  
相及箕斗間漢津高麗地也太白為兵亦罰星也二十年  
七月丁未歲星守東壁占曰五穀以水傷二十一年四月

戊寅月犯熒惑占曰貴臣死十二月丁丑月食昴占曰天子破匈奴二十二年五月丁亥犯右執法七月太白晝見乙巳鎮星守東井占曰旱閏十二月辛巳太白犯建星占曰大臣相譖永徽元年二月己丑熒惑犯東井占曰旱四月己巳月犯五諸侯熒惑犯輿鬼占曰諸侯凶五月己未太白晝見二年六月己丑太白入太微犯右執法九月甲午犯心前星十二月乙未太白晝見三年正月壬戌犯牽牛牽牛為將軍又吳越分也丁亥歲星掩太微上將二

月己丑熒惑犯五諸侯五月戊子掩右執法四年六月己丑太白晝見六年七月乙亥歲星守尾占曰人主以嬪為后己丑熒惑入輿鬼八月丁卯入軒轅顯慶元年四月丁酉太白犯東井北轅占曰秦有兵五年二月甲午熒惑入南斗六月戊申復犯之南斗天廟去復來者其事大且久也龍朔元年六月辛巳太白晝見經天九月癸卯犯左執法二年七月己丑熒惑守羽林羽林禁兵也三年正月己卯犯天街占曰政塞姦出六月乙酉太白入東

井占曰君失政大臣有誅麟德二年三月戊午熒惑犯  
東井四月壬寅入輿鬼犯質星乾封元年八月乙巳熒  
惑入東井二年五月庚申入軒轅三年正月乙巳月犯  
軒轅大星咸亨元年四月癸卯月犯東井占曰人主憂  
七月壬申熒惑入東井占曰旱丙申月犯熒惑占曰貴  
人死十二月丙子熒惑入太微二年四月戊辰復犯太  
微垣將相位也五年六月壬寅太白入東井上元二年  
正月甲寅熒惑犯房占曰君有憂一曰有喪三年正月



丁卯太白犯牽牛占曰將軍孟儀鳳二年八月辛亥太白犯軒轅左角左角貴相也三年十月戊寅熒惑犯鉤鈴四年四月戊午入羽林占曰軍憂調露元年七月辛巳入天囷永隆元年五月癸未犯輿鬼丁酉太白晝見經天是謂陰乘陽陽君道也永淳元年五月丁巳辰星犯軒轅九月庚戌熒惑入輿鬼犯質星十一月乙未復犯輿鬼去而復來是謂句已垂拱元年四月癸未辰星犯東井北軒轅辰星為廷尉東井為法令失道則相犯

也十二月戊子月掩軒轅大星二年三月丙辰復犯之  
萬歲通天元年十一月己丑歲星犯司怪占曰水旱不  
時聖歷元年五月庚午太白犯天關天關主邊事二年  
熒惑入輿鬼三年三月辛亥歲星犯左執法久視元年  
十二月甲戌晦熒惑犯軒轅自乾封二年後月及熒惑  
太白辰星凌犯軒轅者六長安二年熒惑犯五諸侯渾  
儀監尚獻甫奏臣命在金五諸侯太史之位火克金臣  
將死矣武后曰朕為卿禳之以獻甫為水衡都尉水生

金又去太史之位卿無憂矣是秋獻甫卒四年熒惑入  
月鎮星犯天闕神龍元年三月癸巳熒惑犯天田占曰  
旱七月辛巳掩氐西南星占曰賊臣在內二年閏正月  
丁卯月掩軒轅后星九月壬子熒惑犯左執法己巳月  
犯軒轅后星十一月辛亥犯昴占曰胡王死戊午熒惑  
入氐十二月丁酉犯天江占曰旱三年五月戊戌太白  
入輿鬼中占曰大臣有誅景龍三年六月癸巳太白晝  
見在東井京師分也四年二月癸未熒惑犯天街五月

甲子月犯五諸侯景雲二年三月壬申太白入羽林八月已未歲星犯執法三月壬申熒惑入東井先天元年八月甲子太白襲月占曰太白兵象月大臣體二年十一月丙子熒惑犯司怪開元二年七月己丑太白犯輿鬼東南星七年六月甲戌太白犯東井鉞星占曰斧鉞用八年三月庚午犯東井北軒轅五月甲子犯軒轅十一年十一月丁卯歲星犯進賢十四年十月甲寅太白書見二十五年六月壬戌熒惑犯房二十七年七月辛

丑犯南斗占曰貴相凶天寶十三載五月熒惑守心五  
旬餘占曰主去其官十四載十二月月食歲星在東井  
占曰其國亡東井京師分也至德二載七月己酉太白  
晝見經天至于十一月戊午不見歷秦周楚鄭宋燕之  
分十二月歲星犯軒轅大星占曰女主謀君乾元元年  
五月癸未月掩心前星占曰太子憂六月癸丑入南斗  
魁中占曰大人憂二年正月癸未歲星蝕月在翼楚分  
也一曰饑二月丙辰月犯心中星占曰主命惡之上元

元年五月癸丑月掩昴占曰胡主死八月己酉太白犯  
進賢十二月癸未歲星掩房占曰將相憂三年建子月  
癸巳月掩昴出昴北八月丁卯又掩昴寶應二年四月  
己丑月掩歲星占曰饑永泰元年九月辛卯太白晝見  
經天大曆二年七月癸亥熒惑入氐其色赤黃乙丑鎮  
星犯水位占曰有水災乙亥歲星犯司怪八月壬午月  
入氐丙申犯畢九月戊申歲星守東井占皆為有兵乙  
丑熒惑犯南斗在燕分十二月丁丑犯壘壁占曰兵起

三年正月壬子月掩畢八月己未復掩畢辛酉入東井  
九月壬申歲星入輿鬼占曰歲星為貴臣輿鬼主死喪  
丁丑熒惑入太微二旬而出己卯太白犯左執法四年  
二月壬寅熒惑守房上相丙午有芒角三月壬午逆行  
入氐中是月鎮星犯輿鬼七月戊辰熒惑犯次相九月  
丁卯犯建星占曰大臣相譖五年二月乙己歲星入軒  
轅六月丁酉月犯進賢庚子犯氐庚戌太白入東井六  
年七月乙己月掩畢入畢中壬子月犯太微八月甲戌

熒惑犯鄭星庚辰月入太微九月壬辰熒惑犯哭星庚  
子犯泣星是夜月掩畢丁未入太微十月丁卯掩畢己  
巳熒惑犯壘壁甲戌月入軒轅占曰憂在後宮十一月  
壬寅入太微丙午掩氐十二月己巳入太微七年正月  
乙未犯軒轅二月戊午掩天關占曰亂臣更天子法令  
己巳熒惑犯天街四月丁巳入東井辛未歲星犯左角  
占曰天下之道不通壬申月入羽林五月丙戌入太微  
八年四月癸丑歲星掩房占曰將相憂又宋分也甲寅



熒惑入壘壁五月庚辰入羽林七月己卯太白入東井  
留七日非常度也占曰秦有兵乙未月入畢中癸未入  
羽林己丑太白入太微占曰兵入天廷八月晝見十月  
丁巳月掩畢壬戌入輿鬼掩質星庚午月及太白入氐  
中占曰君有哭泣事十一月己卯月入羽林癸未太白  
入房占曰白衣會不曰犯而曰入蓋鉤鈐間癸丑月掩  
天關甲寅入東井癸酉入羽林九年三月丁未熒惑入  
東井四月丁丑月入太微五月己未太白入軒轅占曰

憂在後宮六月己卯月掩南斗庚辰入太微七月甲辰  
掩房辛亥入羽林壬戌入輿鬼九月辛丑太白入南斗  
占曰有反臣又曰有赦甲子熒惑入氐宋分也十月戊  
子歲星入南斗占曰大臣有誅十二月戊辰月入羽林  
十年三月庚戌熒惑入壘壁四月甲子入羽林八月戊  
辰月入太微十一年閏八月丁酉太白晝見經天十二  
年正月乙丑月掩軒轅癸酉掩心前星宋分也丙子入  
南斗魁中二月乙未鎮星入氐中占曰其分兵喪李正

已地也三月壬戌月入太微四月乙未掩心前星五月  
丙辰入太微戊戌入羽林七月庚戌入南斗乙亥熒惑  
入于東井十月壬辰月掩昴庚子入太微十一月乙卯  
入羽林十二月壬午復入羽林自六年至此月入太微  
者十有二入羽林者八熒惑三入東井再入羽林三入  
壘壁月太白歲星皆入南斗魁中十四年春歲星入東  
井建中元年十一月月食歲星在秦分占曰其國亡  
是月歲星食天尸天尸輿鬼中星占曰有妖言小人在

位君王失樞死者大半三年七月月掩心中星貞元四年五月丁卯月犯歲星在營室六月癸卯熒惑逆行入羽林占曰軍有憂六年五月戊辰月犯太白間容一指占曰大將死十年四月太白晝見十一年七月熒惑太白相繼犯太微上將十三年二月戊辰太白入昴三月庚寅月犯太白十九年三月熒惑入南斗色如血斗吳越分色如血者旱祥也二十一年正月己酉太白犯昴趙分也永貞元年十二月丙午月犯畢己酉歲星犯太

微西垣將相位也元和元年十月太白入南斗十二月  
復犯之斗吳分也二年正月癸丑月犯太白于虛女二  
月壬申月掩歲星占曰大臣死四月丙子太白犯東井  
北轅已卯月犯房上相三年三月乙未鎮星蝕月在氐  
占曰其地主死四年九月癸亥太白犯南斗七年正月  
辛未月掩熒惑五月癸亥熒惑犯右執法六月己亥月  
犯南斗魁八年七月癸酉月犯五諸侯十月己丑熒惑  
犯太微西上將十二月掩左執法九年二月丁酉月犯

心中星七月辛亥掩心中星占曰其宿地凶心豫州分  
壬辰月掩軒轅是月太白入南斗至十月出乃晝見熒  
惑入南斗中因留犯之南斗天廟又丞相位也十年八  
月丙午月入南斗魁中十一年二月丙辰月掩心是月  
熒惑入氐因逆行三月己丑月犯鎮星在女齊分也四  
月丙辰太白犯輿鬼占曰有僂臣六月甲辰月掩心後  
星是月熒惑復入氐是謂句己十一月戊寅月犯歲星  
十二月甲午犯鎮星在危亦齊分也十二年二月丁丑

月犯心十三年正月乙未歲星逆行犯太微西上將三  
月熒惑入南斗因逆留至于七月南斗中大如五升器  
色赤而怒乃東行非常也八月甲戌太白犯左執法乙  
巳熒惑犯哭星十月甲子月犯昴趙分也十四年正月  
癸卯月犯南斗魁占曰相函五月丙戌月犯心中星七  
月乙酉掩心中星十五年正月丙申復犯中星四月太  
白犯昴七月庚申熒惑逆行入羽林八月己卯月掩牽  
牛吳越分也十一月壬子月犯東井北轅長慶元年正

月丙午月掩東井鉞遂犯南轅第一星二月乙亥太白  
犯昴趙分也丁亥月犯歲星在尾占曰大臣死燕分也  
三月庚戌太白犯五車因晝見至于七月以歷度推之  
在唐及趙魏之分占曰兵起七月壬寅月掩房次相九  
月乙巳太白犯左執法二年九月太白晝見熒惑守天  
困六旬餘乃去占曰天困上帝之藏耗祥也十月熒惑  
犯鎮星于昴甲子月掩牽牛中星占曰吳越亡十一月  
丁丑掩左角十二月復掩之占曰將死甲寅月犯太白



于南斗四年三月庚午太白犯東井北轅遂入井中晝  
見經天七日而出因犯輿鬼京師分也五月乙亥月掩  
畢大星六月丙戌鎮星依厯在紫觜羸行至參六度當  
居不居失行而前遂犯井鉞占曰所居宿久國福厚易  
福薄又曰羸為王不寧鉞主斬刈而又犯之其占重癸  
未熒惑犯東井丁亥入井中己丑太白犯軒轅右角因  
晝見至于九月占曰相凶十月辛巳月入畢口十一月  
熒惑逆行向參鎮星守天關十二月戊子月掩東井寶

歷元年四月壬寅熒惑入輿鬼掩積尸七月癸卯犯執  
法甲辰鎮星犯東井甲子月掩畢大星癸未太白犯南  
斗丙戌月犯畢十月辛亥犯天囷十一月庚辰鎮星復  
犯東井癸未月犯東井二年正月甲申犯左執法戊子  
入于氐二月丙午犯畢五月甲午熒惑犯昴六月太白  
犯昴七月壬申月犯畢八月庚戌熒惑犯輿鬼太和元  
年正月庚午月掩畢三月癸丑入畢口掩大星月變于  
畢者自寶歷元年九月及茲而五五月月掩熒惑在太

微西垣丙戌熒惑犯右執法太和二年正月庚午月掩  
鎮星七月甲辰熒惑掩輿鬼質星十月丁卯月掩東井  
北轅三年二月乙卯太白犯昴壬申熒惑犯右執法七  
月入于氐十月入于南斗四年四月庚申月掩南斗杓  
次星十一月辛未熒惑犯右執法五年二月甲申月掩  
熒惑犯南斗杓次星六年四月辛未月掩鎮星于端門  
己丑太白晝見七月戊戌月掩心大星辛丑掩南斗杓  
次星七年五月甲辰熒惑守心中星六月丙子月掩心

中星遂犯熒惑七月甲午月掩心中星丙申掩南斗口  
第二星九月丁巳入于箕戊辰入于南斗癸酉太白入  
南斗冬鎮星守角八年二月始去七月戊子月犯昴十  
月庚子熒惑鎮星合于亢十二月丙戌月掩昴是歲月  
入南斗者五占曰大人憂九年夏太白晝見自軒轅至  
于翼軫六月庚寅月掩歲星在危而暈十月庚辰月復  
掩歲星在危開成元年正月甲辰太白掩建星占曰大  
臣相譖六月丁未月掩心前星八月己巳入南斗二年

正月壬申月掩昴二月己亥月掩太白于昴中六月甲寅月掩昴而暈太白亦有暈六月己酉大星晝見庚申太白入于東井七月壬申月入南斗丁亥掩太白于柳八月壬子太白入太微遂犯左右執法九月丙子月掩昴三年二月己酉掩心前星二月戊午熒惑入東井三月乙酉入輿鬼五月辛酉太白犯輿鬼庚午月犯心中星甲寅太白犯右執法七月乙丑月掩心前星十月辛卯太白犯南斗四年二月丁卯月掩歲星于畢三月乙酉

掩東井七月乙未月犯熒惑占曰貴臣死八月壬申熒  
惑犯鉞遂入東井十月戊午辰星入南斗魁中占曰大  
赦五年春木當王而歲星小闇無光占曰有大喪二月  
壬申熒惑入輿鬼四月太白歲星入輿鬼五月辰星見  
于七星色赤如火七月乙酉月掩鎮星會昌元年閏八  
月丁酉熒惑入輿鬼中占曰有兵喪十二月庚午月犯  
太白于羽林二年正月壬戌掩太白于羽林六月丙寅  
太白犯東井十月丙戌月掩歲星于角三年三月丙申

又掩歲星于角七月癸巳熒惑入東井色蒼赤動搖井  
中八月丁丑犯輿鬼十月壬午晝月食太白于亢四年  
二月歲星守房掩上相熒惑逆行守軒轅四旬乃去庚  
申月掩畢大星十月癸未太白與熒惑合遂入南斗五  
年二月壬午太白掩昴五月辛酉入畢口八月壬午犯  
軒轅大星九月癸巳熒惑犯太微上將六年二月丁丑  
犯畢大星丁亥月出無光犯熒惑于太微頃之乃稍有  
光遂犯左執法丙申掩牽牛南星遂犯歲星牽牛揚州

分大中十一年八月熒惑犯東井咸通十年春熒惑逆行守心乾符二年四月庚辰太白晝見在昴三年七月常星晝見四年七月月犯房六年冬歲星入南斗魁中占曰有反臣光啓二年四月熒惑犯月角文德元年七月丙午月入南斗八月熒惑守輿鬼占曰多戰死龍紀元年七月甲辰月犯心乾寧二年七月癸亥熒惑犯心光化二年鎮星入南斗三年八月壬申太白應見在氏不見至九月丁亥乃見是謂當出不出十一月丁未太



白犯月因晝見天復元年五月自丁酉至于己亥太白  
晝見經天在井度十月大角五色散搖煌煌如火占曰  
王者惡之二年五月甲子太白襲熒惑在軒轅后星上  
太白遂犯端門又犯長垣中星占曰賊臣謀亂京畿大  
戰十月甲戌太白夕見在斗去地一丈而墜占曰兵聚  
其下又曰山摧石裂大水竭庚子辰星見氐中小而不  
明占曰負海之國大水是歲鎮星守虛三年二月始去  
虛十一月丙戌太白在南斗去地五尺許色小而黃至

明年正月乃高十丈光芒甚大是冬熒惑徘徊于東井  
間久而不去京師分也天祐元年二月辛卯太白夕見  
昴西色赤炎燄如火壬辰有三角如花而動搖占曰有  
反城有火災胡兵起六月甲午太白在張芒角甚大癸  
丑句已犯水位自夏及秋大角五色散搖煌煌然占同  
天復初三年八月丙午歲星在哭星上生黃白炁如孛  
狀五星聚合武德元年七月丙午鎮星太白辰星聚于  
東井關中分也二年三月丙申鎮星太白辰星復聚于

東井九年六月己卯歲星辰星合于東井占曰為變謀  
貞觀十八年五月太白辰星合于東井占曰為兵謀十  
九年六月丙辰太宗征高麗次安市城太白辰星合于  
東井史記曰太白為主辰星為客為蠻夷出相從而兵  
在野為戰永徽元年七月辛酉歲星太白合于柳在秦  
分占曰兵起景龍元年十月丙寅太白熒惑合于虛危  
占曰有喪景雲二年七月鎮星太白合于張占曰內兵  
太極元年四月熒惑太白合于東井天寶九載八月五

星聚于尾箕熒惑先至而又先去尾箕燕分也占曰有德則慶無德則殃十四載二月熒惑太白關于畢昴井鬼間至四月乃伏十五載五月熒惑鎮星同在虛危中天芒角大動搖占者以為北方之宿子午相冲灾在南方至德二載四月壬寅歲星熒惑太白辰星聚于鶉首從歲星也罰星先去而歲星留占曰歲星熒惑為陽太白辰星為陰陰主外邦陽主中邦陽與陰合中外相連以兵八月太白芒怒掩歲星于鶉火又書見經天鶉火

周分也乾元元年四月熒惑鎮星太白聚于營室太史  
南宮沛奏其地戰不勝衛分也大厯三年七月壬申五  
星並出東方占曰中國利八年閏十一月壬寅太白辰  
星合于危齊分也十年正月甲寅歲星熒惑合于南斗  
占曰饑旱吳越分也一曰不可用兵七月庚辰太白辰  
星合于柳京師分也建中二年六月熒惑太白鬪于東  
井四年六月熒惑太白復鬪于東井京師分也金火罰  
星鬪者戰象也興元元年春熒惑守歲星在角亢占曰

有反臣角亢鄭也貞元四年五月乙亥歲星熒惑鎮星  
聚于營室占曰其國亡地在衛分六年閏三月庚申太  
白辰星合于東井占為兵憂戊寅熒惑犯鎮星在奎魯  
分也元和九年十月辛未熒惑犯鎮星又與太白合于  
女在齊分十年六月辛未歲星熒惑太白辰星合于東  
井占曰中外相連以兵十一年五月丁卯歲星辰星合  
于東井六月己未復合于東井占曰為變謀而更事十  
一月戊子鎮星熒惑合于虛危十二月鎮星太白辰星

聚于危昏齊分也十四年八月丁丑歲星太白辰星聚于軫占曰兵喪在楚分與南方夷貊之國十五年三月鎮星太白合于奎占曰內兵徐州分也十二月熒惑鎮星合于奎占曰主憂長慶二年二月甲戌歲星熒惑合于南斗占曰饑旱八月丙寅熒惑犯鎮星在日卯畢因留相守占曰主憂四年八月庚辰熒惑犯鎮星于東井鎮星既失行犯鉞而熒惑復往犯之占曰內亂寶曆二年八月丁未熒惑鎮星復合于東井輿鬼間太和二年九

月歲星熒惑鎮星聚于七星三年四月壬申歲星犯鎮  
星占曰饑四年五月丙午歲星太白合于東井六年正  
月太白熒惑合于羽林十月太白熒惑鎮星聚于軫八  
年七月庚寅太白熒惑合相犯推歷度在翼近太微占  
曰兵起開成三年六月丁亥太白犯熒惑于張占曰有  
喪四年正月丁巳熒惑太白辰星聚于南斗推歷度在  
燕分占曰内外兵喪改立王公冬歲星熒惑俱逆行失  
色合于東井京師分也會昌二年六月乙丑熒惑犯歲



星于翼占曰旱四年十月癸未太白熒惑入于南斗咸  
通中熒惑鎮星太白辰星聚于畢昴在趙魏之分詔鎮  
州王景崇被袞冕軍府稱臣以厭之文德元年八月歲  
星鎮星太白聚于張周分也占曰內外有兵為河內河  
東地光化三年十月太白鎮星合于南斗占曰吳越有  
兵

五星並伏

景德四年司天判監史序奏今年太歲丁未六月二十

五日五星當聚周分既而重奏臣尋推得五星自閏五月二十五日近太陽行度按井氏星經曰五星近太陽而輒見者如君臣齊明下侵上之道也若伏而不見即臣讓明於君此百千載未有也但恐今夜五星皆伏真宗親御禁臺以候之果達旦不見大赦天下加序一官羣臣表賀

論天象之異

葉適

唐以來天象之異者上元二年七月癸未朔日有食之

既大星皆見在張十四度貞觀初突厥五日並照元和  
二年十月壬午日旁有黑氣如人形跪手捧盤向日盤  
中氣如人頭乾符六年十一月丙寅朔有兩日並出而  
鬪三日乃不見廣明元年日暈如虹黃氣蔽日天祐二  
年正月甲申乙酉日有黃白暈暈上有青赤背暈中生  
白虹漸長向東百餘丈二月乙巳有蒼白雲夾日長各  
六尺餘既而雲變狀如人馬乃消貞觀初突厥三月並  
見儀鳳二年正月甲子朔月見西方武后時月過望不

虧者二光宅元年九月丁丑有星如半月見西方開成  
二年二月有彗至三月遍指四方自是至會昌元年無  
歲不彗天復元年五月夕有星當箕下如炬火炎炎上  
衝人初以為燒火也高丈餘乃殞天祐元年四月有星  
狀如人首赤身黑在北斗下紫微中占曰天衝也天衝  
抱極泣帝前血濁霧下天下寃元和六年三月戊戌日  
晡天陰寒有流星大如一斛器墜於兗鄆間聲聞數百里  
野雉皆雊所墜上有赤氣如立蛇長丈餘至夕而乃滅

咸通九年十一月丁酉有星出如匹練亘空化為雲而  
沒十三年春有二星從天際而上相從至中天狀如旌  
旗乃殞天祐元年五月戊寅乙夜雨晦暝有星長二十  
丈出東方西南向首黑尾赤中白按自春秋至隋日月  
星之變學者多能記之而唐以來鮮有言者故畧具一  
二浮屠氏書至唐始盛行於中國然實與春秋僖文同  
時雖夷夏殊方然蓋先秦古文也其叙二日兩月乃至  
暈璫珮玦彗孛飛流負珥虹蜺之類以為同分罔見但

此國見彼國本所不見亦復不聞始其惡緣所感而致不然則突厥之五日三月使誠不謬而中國人莫之見何也今星厯家言盡西必占狼星極南必斗又以聲教所不暨占昏為狗國此為其國無人言之也若聰明有賢聖者出則其占不止如此故天竺能厯龜茲能樂皆與中國無異又安得專以狼星斗限之哉余益知山河兩戒分異之說為非的矣

秦階六符經後序

吳萊

秦階六符經者本黃帝有熊氏世不傳當漢建元之間  
東方朔始陳其說欲以觀天表之變定上心之侈者應  
劭仲遠又疏其文頗類井石諸人所為託之者也蓋古  
昔聖人之論陰陽五行者尚矣幽贊乎神道發揮乎天  
理是豈無其故乎特未嘗膠於多忌之學欲肆其一定  
之說也苟曰乾坤開闢莫非一造化亭毒之妙某言必  
有某徵某事必有某應喜樂好惡出於人之情饑華泄  
電興於天之治天人兩間似皆有以潛回其機密運其

軸而無難者是亦管窺蠡測而已矣自劉向言皇極之  
建不建京房又推易卦直日用事董仲舒眭孟之徒又  
分春秋二百四十二年災異之驗或身遽以死或國隨  
以滅迄不少救然而天文月令讖緯術數百家雜起不  
曰龜龍河洛洞幽靈之府必曰鈐決冥奧覈禍福之源  
蠱談而涌辯啟穴而鑿牖抵足以長姦偽而甚不足以  
祛邪惑者大率漢世世主以是論政儒生以是論學何  
其泥也子不語怪力亂神又曰性與天道不可得而聞



也庸詎有若是云云者乎當東方朔陳是說時上始為  
微行行暴肆侈越制亡度舉蓋屋郭杜陸海之饒廣上  
林苑東征西伐軍旅數起黎民失業父子相食斯其為  
人痾也酷矣天人一理也吾知修吾事以畏天可也日  
蝕地震冬雷夏霜蒙氣還風旱乾水溢天之為也人何  
與焉天豈若世之小丈夫然哉恣然喜頽然怒人人而  
欲應之以吉凶妖孽之決也一日之頃雖千技百變而  
為之亦不足矣要之天為天人為人毋相瀆也至其所

以兼統而一貫之者昭昭冥冥理無變氣有變也然上  
初即位天表已多變關東大饑風赤如血齊楚二十九  
山同日崩考之人事則猶未有可感者變何自作哉將  
人子未嘗有過父母乃先作色以待其有過固不可也  
使朝廷多欲之心一室文景富庶之政未改是且委之  
天運之適然者歟抑亦君德之勝為足以銷天變之迭  
至者歟不然未可知也而今乃欲以膚學謏聞者盡之  
則非矣揚子雲曰通天地人曰儒通天地而不通人曰

伎嗚呼伎而止者此非黃帝書也其石諸人所為託之  
者也雖然觀是者又可無畏乎哉

周羣傳

陳壽

周羣字仲直巴西閬中人也父舒字叔布少學術於廣  
漢楊厚名亞董扶任安數被徵終不詣時人有問春秋  
讖曰代漢者當塗高此何謂也舒曰當塗高者魏也鄉  
黨學者私傳其語羣少受學於舒專心候業於庭中作  
小樓家富多奴常令奴更直於樓上視天災纔見一氣

即白羣羣自上樓觀之不避晨夜故凡有氣候無不見之者是以所言多中州牧劉璋辟以為師友從事續漢書曰建安七年越雋有男子化為女人時羣言哀帝時亦有此將易代之祥也至二十五年獻帝果封于山陽十二年十月有星孛于鶉尾荆州分野羣以為荆州牧將死而失土明年秋劉表卒曹公平荆州十七年十二月星孛于五諸侯羣以為西方專據土地者皆將失土是時劉璋據益州張魯據漢中韓遂據涼州宋建據枹

罕明年冬曹公遣偏將擊涼州十九年獲宋建韓遂逃于羌中被殺其年秋璋失益州二十年秋曹公攻漢中張魯降先主定蜀署儒林校尉先主欲與曹公爭漢中問羣羣對曰當得其地不得其民也若出偏軍必不利當戒慎之時州後部司馬蜀郡張裕亦曉占候而天才過羣裕字南和諫先主曰不可爭漢中軍必不利先主竟不用裕言果得地而不得民也遣將軍吳蘭雷銅等入武都皆沒不還悉如羣言於是舉羣茂才裕又私語

人曰歲在庚子天下當易代劉氏祚盡矣主公得益州九年之後寅卯之間當失之人密白其言初先主與劉璋會涪時裕為璋從事侍坐其人饒鬚先主嘲之曰昔吾居涿縣特多毛姓東西南北皆諸毛也涿令稱曰諸毛繞涿居乎裕即答曰昔有作上黨潞長遷為涿令涿令者去官還家時人與書欲署潞則失涿欲署涿則失潞乃署曰潞涿君先主無鬚故裕以此及之先主常銜其不遜加忿其漏言乃顯裕諫爭漢中不驗下獄將誅

之諸葛亮表請其罪先主答曰芳蘭生門不得不鉏裕  
遂棄市後魏氏之立先主之薨皆如裕所刻



稗編卷五十



欽定四庫全書

子部  
稗編卷五十二

詳校官中書臣賈 銳

主事臣祁韻士覆勘

總校官中書臣朱 鈐

校對官檢討臣郭 寅

謄錄監生臣劉 書

欽定四庫全書

裨編卷五十一

明 唐順之 撰

諸家九

天文

分野論

蘇伯衡

分野之說其傳也遠而周禮春秋傳始詳焉春官保章氏以星土辨九州之地所封封域皆有分星以觀妖祥左氏內傳曰參為晉星商主大火外傳曰歲星所在則我有周之分野也此分野之說見於周禮春秋傳然也

至漢地理志乃言分野為始密謂秦為東井與鬼之分  
野魏為觜觿參之分野周為柳七星張韓為角亢氐趙  
為昴畢燕為尾箕齊為虛危魯為奎婁宋為房心衛營  
室東壁楚為翼軫吳為斗粵為牽牛婺女而鄭康成則  
謂堪輿雖有郡國所入度非古數也今其存可言者十  
二次之分也星紀吳越也玄枵齊也娵訾衛也降婁魯  
也大梁趙也實沈晉也鶉首秦也鶉火周也鶉尾楚也  
壽星鄭也大火宋也析木燕也觀乎左氏謂熒惑守心

宋景禳其咎實沈為祟晉侯受其殃鄭氏謂分野之妖  
祥主用客星彗孛之氣以為象則驗菑祥於星土其法  
蓋古有之不可誣也然而吳越之地南而星紀則在丑  
齊之地東而玄枵則在子魯之地亦東而降婁則在戌  
東西南北往往相反而不相配是則誠為有可疑者杜  
預等註既莫能詳而鄭氏則謂諸國中之封域於星亦  
有分焉其書亡矣夫有其書而既亡此後之人所以求  
其說而不得自漢以下星官史家叅之以度數分毫析

縷各極其至而十二次之分野相配之理卒莫有明言之者嗟乎夫豈以不足言而弗言之歟唐天文志浮圖一行皆以河漢為言固以疏遠及賈公彥輩乃援古昔受封之日歲星所在之辰其國屬焉以為證若然則三代之分野皆當不同而列所屬亦必有同焉者矣嘗試論之分野視分星古不謂地也地有彼此之不齊而分野在天則一定而不易以彼此不齊之地必欲求配於在天十二次整然之分野其說之難通也固宜蓋天有

三垣紫微太微天市是也紫微太微皆將相輔佐之位而天市下垣則列國星宿之所在其星東西二十有二宋南海燕東海徐吳越齊中山九河趙魏韓楚梁巴蜀秦周鄭晉河間河中曰分野者指列星所屬之分而言也鄭氏所謂星土星所主土是也其國在此而星則在彼彼此若不相配而其為象未嘗不相屬非地之在北者其分野在天亦居北地之在南者分野在天亦居南也列國之在天下彼此縱橫之不齊猶犬牙然而欲以

其地之不齊者求合乎在天分野之整然彼此之不相配無足怪者甚者至於天之北極為天之首其體及背故有吳北魯東之差其惑甚矣易不云乎在天成象在地成形水火金木土其形在地者也而天有其五星焉所謂象也豈惟五星哉凡物莫不皆然矣故夫齊吳燕宋韓楚周秦魏趙諸國之地地之形也而其星在天象之謂也地有是形則天有是星天有是星則有是名曰齊吳燕宋韓楚周秦魏趙列國者非後世有是名而舉

以為分野之名也何以知其然也徵諸東海南海九河  
河間河中巴蜀中山有以知之也東海南海九河河間  
河中非國中山巴蜀非若諸國之顯也故曰地有是形  
則天有是星而分野者指列星所屬之分而言也或曰  
若然則十二次之說將無所徵歟曰十有二次所以驗  
天運之度數日躔之次舍此蓋古法而歷家之所取驗  
者也因其度數次舍之所在而妖祥見焉則其所屬之  
地從亦可徵矣抑分野之說固豈專係於是哉



夏小正解

傅松卿

正月啓蟄言始發蟄也鴈北鄉先言鴈而後言鄉者何也見鴈而後數其鄉也鄉者何也鄉其居也鴈以北方為居何以謂之為居生且長焉爾九月遰音鴻鴈先言遰而後言鴻鴈何也見遰而後數之則鴻鴈也何不謂南鄉也曰非其居也故不謂南鄉記鴻鴈之遰也而不記其鄉何也曰鴻不必當小正之遰者也雉震响震也者鳴也响也者鼓其翼也正月必雷雷不必聞惟雉為

必聞之何以謂之雷則雉震响相識以雷魚陟負冰陟  
升也負冰云者言解蟄也農緯厥耒緯束也束其耒云  
爾者是見君之亦有耒也初歲祭耒始用暢也暢也者  
終歲之用祭也其曰初云爾也者言是月之始用之也  
初者始也或曰祭韭也圃有韭圃也圃之燕者也時有  
俊風俊者大也大風南風也何大於南風也曰合冰必  
於南風解冰必於南風生必於南風收必於南風故大  
之也寒日滌凍塗滌也者變也變而暖也凍塗也者凍

下而澤上多也田鼠出田鼠者嗛鼠也記時也農率均  
田率者循也均田者始除田也言農夫急除田也獺祭  
魚其必與之獻何也曰非其類也祭也者得多也善其  
祭而後食之十月豺祭獸謂之祭獺祭魚謂之獻何也  
豺祭其類獺祭非其類故謂之獻大之也鷹則為鳩鷹  
也者其殺之時也鳩也者其非殺之時也善變而之仁  
也故其言之也則盡其辭也鳩為鷹變而之不仁也故  
不盡其辭也農及雪澤言雪澤之無高下也初服於公

田古有公田焉者古言先服公田而後服其田也采芸  
為廟采也鞠則見鞠者何也星名也鞠則見者歲再見  
爾初昏參中蓋記時也云斗柄縣在下言斗柄者所以  
著參之中也柳稊稊也者發乎也梅杏杔桃則華杔桃  
山桃也緹縞緹縞也者莎隨也緹也者其實也先言緹  
而後言縞者何也緹先見者何也何以謂之小正以著名  
也鷄桴粥粥也者相粥之時也或曰桴媪伏也粥養也  
二月往耋黍禪禪單也初俊羔助厥毋粥俊也者大也

粥也者養也言大羔能食草木而不食其母也羊羔非其子而後養之善養而記之也或曰憂有煮祭祭也者用羔是時也不足喜樂喜羔之為生也而記之與羊牛腹時也綏多女士綏安也冠子取婦之時也丁亥萬用入學丁亥者吉日也萬也者干戚舞也入學也者大學也謂今時大舍采也祭鮪祭不必記記鮪何也鮪之至有時美物也鮪者魚之先至者也而其至有時謹記其時榮莖菜色采繁繁由胡繁由胡者繁母也繁萬勃也

皆豆實也故記之昆小蟲抵蚘昆者衆也由菟螺菟也者動也小蟲動也其先言動而後言蟲者何也萬物著動而後著抵猶推也蚘螳卵也為祭醢也取之則必推之推之必不取取必推而不言取來降燕乃睇燕乙也降者下也言來者何也莫能見其始出也故曰來降言乃睇何也睇者眄也視可為室者也百鳥皆曰巢突穴取與之室何也操泥而就家人人內也剝鱗以為鼓也有鳴倉庚倉庚者商庚也商庚者長股也榮芸時有見

梯始收有見梯而後始收是小正序也小正之序時也  
皆若是也梯者所為豆實三月參則伏伏者非亡之辭  
也星無時而不見我有不見之時故曰伏云攝桑攝桑  
而記之急桑也委楊楊則花而後記之犂羊羊有相還  
之時其類犂犂然記變爾或曰犂羝也穀則鳴穀天螻  
也頒冰者分冰以授大夫也采識識草也妾子始蠶先  
妾而後子何也事有漸也言自卑事者始執養宮事執  
操也養長也祈麥實麥實者五穀之先見者故急祈而

記之也越有小旱越于也記是時恒有小旱田鼠化為  
鴛鴦鶴也變而之善故盡其辭也鴛為鼠變而之不善  
故不盡其辭也拂桐芭拂也者拂也桐芭之時也或曰  
言桐芭始生貌拂拂然也鳴鳩言始相命也先鳴而後  
鳩何也鳩者鳴而後知其鳩也四月昴則見初昏南門  
正南門者星也歲再見壹正蓋大正所取法也鳴札札  
者寧縣也鳴而後知之故先鳴而後札圃有見杏圃者  
山之燕者也鳴蜮鳴蜮也者或曰屈造之屬也王賁莠



取荼荼也者以為君薦蔣莠幽越有大旱記時爾執陟  
攻駒執也者始執駒也執駒也者離之去母也執而升  
之君也攻駒也者教之服車數舍之也五月參則見參  
也者牧星也故盡其辭也浮游有殷殷衆也浮游殷之  
時也浮游者渠畧也朝生而暮死稱有何也有見也鳩  
則鳴鳩者百鷓也鳴者相命也其不辜之時也是善之  
故盡其辭也時有養日養長也一則在本一則在末故  
其記曰時養日之也乃瓜乃者急瓜之辭也瓜也者始

食瓜也良蜩鳴良蜩也者五采具匱之興五日翕望乃  
伏其不言生而稱興何也不知其生之時故曰興以其  
興也故言之興五日翕也望也者月之望也而伏云者  
不知其死也故謂之伏五日也者十五日也翕也者合  
也伏也者入而不見也啓灌藍蓼啓者別也陶而疏之  
灌者聚生者也記時也鳩為鷹唐蜩鳴唐蜩鳴者匱也  
初昏大火中大火者心也心中種黍菽糜時也煮梅為  
豆實也蓄蘭為沐浴也菽糜以在經中又言之時何也

是食矩關而記之頡馬分大夫卿之駒也將間諸則或取離駒納之則法也六月初昏斗柄正在上五月大火中六月斗柄正在上用此見斗柄之不在當心也蓋當依依尾也煮桃桃也者柶桃也柶桃也者山桃也煮以為豆實也鷹始摯始摯言之何也諱煞之辭也故摯云七月秀萑葦未秀則不為萑葦秀然後為萑葦故先言秀狸子肇肆肇始也肆遂也言其始遂也其或曰肆殺也湟潦生革湟下處也有湟然後有潦有潦而後有革

草也爽死爽也者猶疏也革莠革也者馬帚也漢案戶  
漢也案戶也者直戶也言正南北也寒蟬鳴蟬也者蜩  
螻也初昏織女正東鄉時有霖雨灌茶灌聚也茶萑葦  
之秀為蔣楮之也萑未秀為莢葦未秀為蘆斗柄縣在  
下則旦八月剝瓜畜瓜之時也玄校玄也者黑也校也  
者若綠色然婦人未嫁者衣之剝棗剝也者取也栗零  
零也者降也零而後取之故不言剝也丹鳥羞白鳥丹  
鳥者謂丹良也白鳥者謂蚊蚋也其謂之鳥也重其養

者也有翼者為鳥蓋也者進也不盡食也辰則伏辰謂星也伏也者入而不見也鹿人從者從羣也鹿之養也離羣而善之離而生非所知時也故記從不記離君子之居幽也不言或曰人人從也者大者於外小者於內率之也駕為鼠參中則旦九月內火內火也者大火大火也者心也遑鴻鴈遑往也主夫出火主夫也者主以時縱火也陟玄鳥螯陟升也玄鳥者鷲也先言陟而後言螯何也陟而後螯也能羆豹貉馳騁則穴若螯也榮

鞠鞠草也鞠榮而樹麥時之急也王始裘者何也衣裘之時也辰繫于日雀入於海為蛤益有矣非常入也十月豺祭獸善其祭而後食之也初昏南門見南門者星名也及此再見矣黑鳥浴者何也烏也浴也者飛乍高乍下也時有養夜夜者長也若日之長也玄雉入於淮為蜃蜃者蒲蘆也織女正北鄉則旦織女星名也十有一月王狩狩者言王之時田冬獵為狩陳筋草陳筋草者省兵甲也嗇人不從不從者弗行於時月也萬物不

通隕麋角隕墜也曰冬至陽氣至始動諸向生皆蒙蒙符矣故麋角隕記時焉爾十有二月鳴弋弋也者禽也先言鳴而後言弋者何也鳴而後知其弋也玄駒賁玄駒也者蝗也賁者何也走於地中也納卵蒜卵蒜也者本如卵者也納者何也納之於君也虞人入梁虞人官也梁者主設罔罟者也隕麋角蓋陽氣且睹也故記之也

夏小正注後序

論聖人不能違時

吳棻

夏小正本古書殘缺近會稽傅松卿頗就大戴禮校讎刊注刻在會稽學宮蓋昔孔子嘗曰我欲觀夏道是故之杞杞不足徵也吾得夏時焉說者則謂夏時夏小正也聖人當春秋之世每告顏淵以王者百世通行之道首曰行夏之時殆取其歲時之正政事之善也此豈果謂夏小正之一書哉周公之時訓呂不韋之月令類若一本於夏小正而又加詳漢魏以降嘗建讀時令之官凡以夏禹周公之典世宜守之而不敢有逸故也後世



儒者若柳宗元輩乃欲舉時訓月令而盡黜之且曰天時之運行有常而王政之設施者無常起居號令慶賞刑威惟其所值而即行之誠不可以非時而暫廢苟不即行而暫廢則天下多滯事矣予試論之天之與人一理與氣而已蓋惟理常為主而氣之所運一屈一伸一開一闔暑焉而土山焦爍寒焉而川澤凝沍天下肖翹蠖蠕根芟浮生之物無不薰蒸融液周流交灌而舉不得逃焉理固在是也聖人之所以為人每全其理之所

賦而又順其氣以行之不敢少逆因時制法按月布政  
春夏陽舒而賞慶行秋冬陰慘而刑威作是皆悉本乎  
天之一屈一伸一開一闔而固非我有作為於其間萬  
一有逆乎此而天道遽為之變一言之發與某休協一  
事之動與某咎應春秋洪範家類能言之而後儒或譏  
其泥者此猶嚮謂時訓月令之可盡黜者也嗚呼夏禹  
周公之典不幾於遽逸矣乎夫夏后氏之政典嘗曰先  
時者殺無赦不及時者殺無赦然所謂先時不及時者

豈有他哉春養孤子秋食耆老每事不敢有違其時者是謂經制盛夏非行師之期而出師窮冬非肆眚之日而肆赦則是一時之所值有不容不舉其事者是謂權術自天道而觀雷霆霜雪一切各以時至者則理之常不以其時至者則氣或有以激之而理則非常聖人之典亦道其常者而已矣今而曰天時之運行有常而王政之設施者無常起居號令慶賞刑威惟其所值而即行之誠不可以非時而暨廢是徒苟用乎一時之權術

而終不得乎王者之經制且夏禹周公之世因時制法  
按月布政天下亦何嘗多滯事哉為此說者殆不究乎  
天人之一致而務欲裂而二之者也然而古者聖人之  
道每與天地之化相為流通泊然而神明內居窅然而  
氣化外變是故冬而震雷夏而造冰宜若或違於天而  
天固不能違之此不可以一概論也自惟聖人知其理  
之若是而必道其常以垂世立教陽氣一通則鑽燧出  
火陰氣一斂則築室藏冰觀其所以彌綸匡贊節宣調

變於天地陰陽之間者豈為無所用其心哉達賢君子  
治其一身且順天地四時之變調其居處節其飲食禁  
其嗜欲適其志意一國之政辟之治身則又大矣傳不  
云乎周歲多燠秦年多寒是特昧乎夏禹周公之典或  
流於舒縱遲緩或陷於嚴酷刻深而不自覺焉者也由  
此觀之孔子嘗有取於夏時者天時與王政相參王政  
得則天道自應後世儒者乃欲與時訓月令而盡黜之  
則先聖人不謂其歲時之正不謂其政令之善哉嗚呼

此亦不得其說矣

時令論上

柳宗元 後同

呂氏春秋十二紀漢儒論以為月令措諸禮以為大法  
焉其言有十二月七十有二候迎日步氣以追寒暑之  
序類其物宜而逆為之備聖人之作也然而聖人之道  
不窮異以為神不引天以為高利於人備於事如斯而  
已矣觀月令之說苟以合五事配五行而施其政令離  
聖人之道不亦遠乎凡政令之作有俟時而行之者有

不俟時而行之者是故孟春修封疆端經術

音遂

相土宜

無聚大衆季春利堤防達溝瀆止田獵備蠶器合牛馬  
百工無悖於時孟夏無起土功無發大衆勸農勉人仲  
夏班馬政聚百樂季夏行水殺草糞田疇美土疆土功  
兵事不作孟秋納材葺仲秋勸人種麥季秋休百工人  
皆入室具衣裘舉五穀之要合秩芻養犧牲趨人收斂  
務蓄菜伐薪為炭孟冬築城郭穿竇塞修囷倉謹蓋藏  
勞農以休息之收水澤之賦仲冬伐木取竹箭季冬講

武習射御出五穀種計耦耕具田器合諸侯制百縣輕重之法貢賦之數斯固俟時而行之所謂敬授人時者也其餘郊廟百祀亦古之遺典不可以廢誠使古之為政者非春無以布德和令行慶施惠養幼少省囿園賜貧窮禮賢者非夏無以贊傑俊遂賢良舉長大行爵出祿斷薄刑決小罪節嗜慾靜百官非秋無以選士勵兵任有功誅暴慢明好惡修法制養衰老申嚴百刑斬殺必當非冬無以賞死事恤孤寡舉阿黨易關市來商旅



審門閭正貴戚近習罷官之無事者去器之無用者則其闕政亦以繁矣斯固不俟時而行之者也變天之道絕地之理亂人之紀舍孟春則可以有事乎作淫巧以蕩上心舍季春則可以為之者乎夫如是內不可以納於君心外不可以施於人事勿書之可也又曰反時令則有飄風暴雨霜雪水潦大旱沈陰氛霧寒暖之氣大疫風欬音求嚏瘧寒疥癘之疾螟蝗五穀瓜瓠果實不成蓬蒿藜莠竝興之異女災胎夭傷水火之訛寇戎來

入相掠兵草竝起道路不通邊境不寧土地分裂四鄙  
入保流亡遷徙之變若是者特瞽史之語非出於聖人  
者也然則夏后周公之典逸矣

時令論下

或者曰月令之所作以為君人者法也蓋非為聰明睿  
智者為之將慮後代有昏昧放誕而肆于人上忽先王  
之典舉而廢之近而取之若陳隋之季是也故取仁義  
禮智信之事附于時令俾時至而有以發之也不為之

將因循放蕩而皆無其意焉爾於是又為之言五行之  
反戾相蕩相摩妖災之說以震動於厥心古之所以防  
昏亂之術也今子發而揚之使前人之奧秘布露顯明  
則後之人而又何憚耶曰聖人之為教立中道以示于  
後曰仁曰義曰禮曰智曰信謂之五常言可以常行者  
也防昏亂之術為之勤勤然書於方冊興亡治亂之致  
永守是而不去也未聞其威之以怪而使之時而為善  
所以滋其怠傲而忘理也語怪而威之所以熾其昏邪

淫惑而為禱禳厭勝鬼怪之事以大亂于人也且吾子  
以為畏冊書之多孰與畏人之言使愕愕者言仁義利  
害焯乎列于其前而猶不悟奚暇顧月令哉是故聖人  
為大經以存其直道將以遺後世之君臣必言其中正  
而去其竒衰其有囂然而不顧者雖聖人復生無如之  
何又何冊書之有若陳隋之季暴戾淫放則無不為矣  
求之二史豈復有行月令之事者乎然而其臣有勁悍  
者爭而與之言先王之道猶十百而一遂焉然則月令

之無益於陳隋亦固矣立大中去大惑捨是而曰聖人之道吾未信也用吾子之說罪我者雖窮萬世吾無憾焉爾

二十四氣論

吳萊

或問歷二十四氣之論予曰是言氣之行有序也而莫不有理存焉俗有相承誤讀者穀雨如雨我公田之雨蓋以此時播種自上而下也今讀為上聲非矣芒種二字見周禮種之隴反芒當音亡謂種之有芒者麥也今

讀芒為忙種去聲非矣處暑如既處之處處止也謂暑  
氣將於此時止也今讀作去聲非矣每月有節氣有中  
氣如丑之終寅之始則為節寅之半則為中一年四立  
即四時節氣二分二至即四時中氣九十日之氣往者  
過而來者續故謂之立九十日之半故謂之分夏冬不  
曰分而曰至至有二義子至巳六陽午至亥六陰至者  
介乎巳午亥子之間也冬至亥陰極故曰至子陽於此  
生亦曰至夏至巳陽極故曰至午陰於此生亦曰至日

影短至長至亦然且以上半年論之立春正月節雨水  
正月中漢律歷志驚蟄在正月中注今作雨水蓋自秋  
分水始涸立冬始冰冬至水泉凍大寒水澤腹堅今日  
雨水者先是為露為霜雪皆水氣凝結以至於寒之極  
春則水氣流行而又為暑之始也況天一生水人物之  
生皆始於水春屬木木生於水今歷立春後繼以雨水  
宜也卦氣正月為泰天氣下降當為雨水二月大壯雷  
在天上當為驚蟄今歷先雨水而後驚蟄亦宜也按國

語四時有八風歷獨指清明風為三月節此風屬巽故  
曰驚蟄者萬物出乎震震為雷也清明者萬物齊乎巽  
巽為風也巽曰潔齊故曰巽風曰清明明有潔齊之  
義律歷亦明潔之義穀雨三月中自雨水後土膏脉動  
今又雨其穀於水也周禮稻人掌稼下地注謂以水澤  
之地種穀即穀雨之謂也漢律歷志穀雨注今作清明  
以今觀之穀雨似遲半月然風土有不同人力有遲速  
必至此然後無不種之穀也四月中小滿先儒云小雪



後陽一日生一分積三十日陽生三十分而成一晝故  
為冬至小滿後陰生亦然夫四月乾之初謂之滿者姤  
初羸豕蹢躅坤初履霜堅冰羸喻其小蹢躅喻其滿霜  
喻其小堅冰喻其滿易言於一陰既生之後歷言於一  
陰方萌之初慮之深防之豫也小雪後有大雪此但有  
小滿無大滿意可知矣若三月中穀雨五月中芒種此  
二氣獨指穀麥言者處暑農乃登穀此曰穀雨農家方  
種穀冀今年之秋也穀必原其生之始者穀種於春得

木之氣成於秋金克木也麥必要其成之終者麥種於  
秋得金之氣成於夏火克金也木氣柔故穀穎垂金氣  
剛故麥穎昂此陰陽自然之理也無穀民何以仰食無  
麥民何以續食春秋大無麥禾則書之此也六月節小  
暑六月中大暑不知者以為夏至後暑已盛不當又謂  
之小殊不知易曰寒往則暑來暑往則寒來寒暑相推  
而歲成焉通上半年皆可謂暑通下半年皆可謂寒正  
月暑之始六月暑之終七月寒之始十二月寒之終而

曰小暑大暑者不過上半年氣候之辭爾陰陽沖和之氣不頓息大暑非驟至於大也由小而馴至於大也六月中暑之極故為大然則未至於極則猶為小也大小二字最可見造化消息進退之理矣復以下半年論之七月中處暑即如豳風首七月暑之終寒之始大火西流暑氣於此乎處也觀處暑二字便自有豳風七月意思八月中白露九月節寒露秋屬金金色白白者露之色寒者露之氣色先白而氣始寒寒固有漸也九月中

霜降露寒始結為霜也立冬後曰小雪大雪寒氣始於  
露中於霜終於雪霜之前為露露由白而後寒霜之後  
為雪雪由小而至大皆有漸至小寒大寒亦猶幽風一  
之日感發二之日栗烈感發風寒故十一月之餘為小  
寒栗烈氣寒故十二月之終為大寒幽土寒早故寒氣  
先要之此不過總結下半年之氣候爾合而言之上半  
年主生曰雨曰雷曰風皆生之氣下半年主成曰露曰  
霜曰雪皆成之氣下半年言天時不言農言農莫急春

夏也先儒言變者化之漸化者變之成立春雨水後寒  
氣漸變至立夏則寒漸化為暑矣然曰小暑大暑其化  
也固有漸焉立秋處暑後暑氣漸變至立冬則暑盡化  
為寒矣然曰小寒大寒其化也亦有漸焉易曰知變化  
之道者其知神之所為乎觀二十四氣可見矣大學以  
格物致知為第一義此亦格物之一端然不特此也調  
元氣化玉燭者知之叅贊變理豈無小補邪

卦候論

章俊卿

七十二候一年二十四氣一氣有三候初中末是也立春正月節也東風解凍蟄蟲始振魚上冰此立春之節氣之三候也雨水正月中也獺祭魚鴻鴈來草木萌動此雨水中氣之三候也周二十四氣則七十二候備矣一行曰卦候七十二候原乎周公時訓書名月令雖頗有增益然先後之次第則同自魏以來始載于歷皆依易軌所傳不合經義今改從古昔一行譏李淳風專用呂氏春秋今也有取乎月令七十二候之說而分配以七十

二卦則月令未可全非也卦止於六十四而坎離震兌居四正宮分主四時此四卦每卦六爻四六二十四每爻當一氣故此四卦分主四時而不專主於一候也其餘六十卦則五卦生六候者中氣之末節氣之初共一卦主之其餘四候各一卦也如中氣初候卦為公中候卦為辟末候卦為侯至於節氣初候卦亦為侯中候卦為大夫末候卦則為卿也五卦主六候六十卦主七十二候也夫坎離震兌且不專主于一候而乾坤二卦何

以各主一候邪蓋六十卦之中所謂辟者君也君主十  
二月中炁也子復丑臨寅泰卯大壯辰夬巳乾午姤未  
遯申否酉觀戌剝亥坤此十二卦主十二月中炁故乾  
坤居巳亥之位也以十二卦分配十二月孟氏章句也  
乾六爻俱為陽一陽生于子而極于巳為六陽故乾居  
巳位坤六爻俱為陰一陰生于午而極于亥為六陰故  
坤居亥位也一陽生為復二陽生為臨三陽為泰四陽  
為大壯五陽為夬六陽為乾乾之所生凡五卦也一陰



生為姤二陰生為遯三陰為否四陰為觀五陰為剝六陰為坤坤之所生凡五卦也乾坤雖分主乎一候而十二中炁皆乾坤之所生也不特此也六十卦可以配七十二候一卦六爻當一日六六三十六以之分配三百六十日可也京房推六十四卦直日悉是道也

雜論風雨雷電霜雪 十則

董仲舒曰陰陽氣上薄為雨下薄為霧風其噫也雲其氣也雷其相搏之聲也電其相擊之光也雨乘虛而墜

風多則合速故雨大而踈風少則合遲故雨細而密太  
平之世風不鳴條雨不破塊雷不驚人電不眩目雪不  
封條此聖人在上陰陽和也鮑敞問曰雨既陰陽相薄  
四月純陽十月純陰無二氣相薄則不雨乎仲舒曰純  
陽用事未夏至一日是敞曰其不雨乎曰然有則妖也

西京  
雜記

邵子曰陽得陰而為雨陰得陽而為風剛得柔而為雲  
柔得剛而為雷無陰則不能為雨無剛則不能為雷雨

柔也而屬陰陰不能獨立故待陽而後興雷剛也而屬體體不能自用必待陽而後發也 又曰有雷則有電有電則有風雨生於水露生於土雷生於石電生於火電與風同為陽之極故有電必有風

觀物張氏曰雷者震之氣也電者離之氣也風者巽之氣也陽為重陰所制怒氣發而為雷怒而極激而為電陰已不能制矣散而為風則反制陰也故風與電皆為陽之極雨者水之氣蒸則為雲凝則為雪露者土之氣

升則為霧結則為霜雷出於石電生於火有雷則有電  
火出於石也 又曰陽唱而陰從則流而為雨陰格而  
陽薄則散而為風剛唱而柔從則蒸而為雲柔畜而剛  
動則激而成雷客主後先陰陽逆順不同也風雨自天  
而降故言陰陽雲雷自地而升故言剛柔天陽也陽必  
資陰故無陰則不能為雨陽得陰然後聚而成體也地  
陰也陰必資陽故無陽則不能為雷陰得陽然後發而  
成聲也此言陰陽之相資也雨之形柔也屬陰者本乎

天之氣也陰不能獨立待陽而興者天之陰資乎天之陽也雷之聲剛也屬體者出乎地之形也體不能自用必待陽而發者地之陰資乎地之陽也

致堂胡氏曰或問雷電何為而然者有形邪有神邪曰古人未之言也然先達大儒亦嘗明其理矣蓋天地之間無非陰陽聚散闔闢之所為也可以神言不可以形論非如異端所謂龍車石斧鬼鼓火鞭怪誕之難信也故其言曰陰氣凝聚陽在內而不得出則奮擊而為雷

電雖聖人復起不能易矣凡聲陽也光亦陽也光發而聲隨之陽氣奮擊欲出之勢也電緩小則震亦緩小電迅大則震亦迅大震電交至則必有雨震而不電電而不震則無雨由陰氣凝聚之有疎緩迅密也曰世人所得雷谷者何物也曰此猶星隕而為石也本乎天者氣而非形偶隕于地則成形矣然而不盡然也曰雷之破山壞廟折樹殺人者何也曰先儒以為陰陽之怒氣也氣鬱而怒方爾奮擊偶或值之則遭震矣然而不盡然

也曰電之閃鑠激疾如金蛇飛騰之狀何謂也曰光之發也惟光耳適映雲際則如是不當乎雲之際而在同雲之中則無是矣凡天地造化之迹苟不以理推之必入于幻怪偽誕之說而終不能明故君子窮理之為要也

性理

朱子曰雷擊所在只一氣袞來間有見而不為害只緣氣未棚裂有所擊處皆是已發蔡季通云人於雷所擊處拾得雷斧之屬是一氣擊後方始結成不是將這箇

來打物見人拾得雷斧如今斧之狀似細黃石 或問  
龍行雨之說曰龍水物也其出與陽氣交蒸故能成雨  
然雨者陰陽之氣蒸鬱而成非必龍之為也 又曰如  
飯甑有益其氣蒸鬱而下汗淋漓則為雨如飯甑不益  
其氣散而不收則為霧 又曰霜只是露結成雪只是  
雨結成古人云露是星月之氣不然今高山頂上雖晴  
亦無露只是自下蒸上人言極西高山亦無霜露或  
問高山無霜露其理如何曰上面氣漸清風漸緊雖微



有霧氣便吹散了所以不結若雪只是雨遇寒而凝故  
高寒處先雪 又曰雪花所以必六出者六為陰數天  
地自然之數也太陰玄精石亦六稜 又曰雪非能為  
豐年其所以然者以其凝結陽氣在地至來歲發達而  
生長萬物也 又曰風與天相似旋轉未嘗息也今此  
處無風或旋在他處或旋在上面都不可知如夏多南  
風冬多北風蓋亦可見

真氏曰雷霆雖威初非為殺物設也易稱鼓萬物者莫

疾乎雷其與日之烜雨之潤風之散同於生物而已世人惡戾之氣適與之會而震死者有之非雷霆求以殺之也

按隋文帝欲以六月殺人大理少卿趙綽爭之帝曰六月豈無雷霆我則天而行有何不可致堂胡氏嘗論之曰雨露猶人君之惠澤雷霆猶人君之號令生成萬物之時固有雷霆而雷霆未嘗殺物隋文取則雷霆而乘怒殺人其違天多矣爾雅曰地氣發而天不應曰霧

莊子曰大塊噫氣其名為風作則萬竅怒號

淮南子曰天地之氣怒者為風和者為雨陰陽相搏而為雷激而為霆亂而為霧陽氣勝則散而為雨露陰氣勝則凝而為雪霜

劉向曰盛陽雨水溫暖而湯熱陰氣協之不相入則轉而為雹盛陰雨雪凝滯而冰寒陽氣薄不相入則散而為霧故沸湯之在閉氣而湛於寒泉則為冰及雪之消亦冰解而散此其驗也



稗編卷五十一